

La discussiun cuntinua – i dovra ina definiziun clera

Duas reacziuns suenter la votaziun davart abitaziuns secundaras

■ **(anr/vi) Reto Pedotti ha plaschair e Daniel Blumenthal è trumpà. Ils dus presidents da Ftan e Vella reageschan tut auter sin il «gea» a l'iniziativa da limitar abitaziuns secundaras. En in punct van els dentant d'accord.** «Jau sun stut a moda positiva», di Pedotti. Suenter la propaganda massiva cunter l'iniziativa haja el temi ch'i na bastia forse tuttina betg. En l'Engiadina hajan ins fatg grond squitsch cun dir che tscherts projects instradads na possian betg vegnir realisads. L'economia da construcziun haja avertì da perder plazzas. «Per mai èsi stà ina sfida da ristgar da s'engaschar per l'iniziativa», di il president da Ftan. El è numnadamain era pertschert che l'iniziativa ha tscherzas deblezzas.

■ **«Era noss giasts han votà gea»**

I sa tractia d'ina iniziativa federala ed ins stoppia vesair: «Era blers da noss giasts han votà 'gea'», di Pedotti. A Ftan dettia quai gia memia bleras abitaziuns secundaras, uschia che la vischnanca na dastgia avrir nagina nova zona da bajegiar pli. Gnanca sche la cooperativa d'abitar «Curtin» vegnia realisada cun pliras abitaziuns per indigens. Quest cunfin haja Ftan gia cuntanschì cun las novas directivas chantunalas e senza il «gea» a l'iniziativa federala.

Il Grischun ha ditg «na» a l'iniziativa. Er ils abitants da Ftan han refusà il project cun 87 cunter 95 vuschs. Las differenzas da vuschs na sajan gnanca uschè grondas en l'Engiadina, constatescha Pe-

dotti. Malgrà la campagna massiva hajan singulas vischnancas sco Samedan, La Punt-Chamues-ch, Bever e Lavin schizunt votà «gea».

■ **Quitads per la proxima generaziun**

«L'iniziativa munta per nus in stop da bajegiar», di *Daniel Blumenthal*. Sco president da Vella vesa el consequenzas nauas per sia regiun. «Per nus e noss uffants na vegni per decennis betg pli ad esser pussaivel da bajegiar abitaziuns da secunda proprietad. Quai fa mal.» Ils uffants stoppian pli tard era pudair viver en la Val. Sche tut saja scumandà bandunian els la regiun.

Bumenthal fa quitads era sco posses-

sur d'ina fatschenta da bajegiar cun 40 plazzas da lavur. Tschertas fatschentas da construcziun stoppian probabel reducir plazzas. I haja consequenzas per ils masternants. Vi da l'economia da bajegiar pendia ina lunga chadaina da secturs d'autras professiuns.

■ **D'accord puncto definiziun**

«Da l'autra vart ha il pievel decidì e quai stuain nus acceptar», di Blumenthal. «Jau sper ch'ins vegnia encunter a nus cun la definiziun da las abitaziuns secundaras.» Impurtant saja che abitaziuns commercialisadas, pia da quellas ch'ins lascha vi regularmain, valian betg sco abitaziuns secundaras. Sche la constituiun federala cuntegna gia ina

restricziun severa possian ins cun la definiziun en la lescha tuttina anc curreger in pau las consequenzas.

Il medem di era *Reto Pedotti*. Impurtant saja tge ch'il parlament a Berna decidia. Lez stoppia definir tge che valia sco abitaziun secundara. «En questa dumonda sun jau relativ liberal», di il president da la vischnanca da Ftan. Ina abitaziun che vegnia dada regularmain a fit na duess betg quintar sco abitaziun secundara. Sche iertavels surpiglian in'abitaziun na duess quella durant ina generaziun era betg valair sco abitaziun secundara. En tals cas stoppian ins differenziar e quai saja fitg pretensius. Perquai gaja la discussiun en mintga cas vinavant.



L'iniziativa federala cunter la construcziun excessiva d'abitaziuns secundaras è vegnida acceptada cun 50,63% da las vuschs. KEYSTONE

■ PUNTG DA VISTA

Memia ditg fatg barlot

DA CLAUDIA CADRUVI / ANR

Onns a la lunga ha il pievel udì da la politica ch'ella veglia franar la surbajegiada da la cuntrada cun abitaziuns da vacanzas. Onns a la lunga ha il pievel – saja quai sin palancà federal, chantunal u communal – cartì e fidà a la politica.

Lezza ha dentant fatg mo bella bucca e davos'aura tegnì si satg a la branscha da construcziun. En il decurs dals dus ultims decennis èn memia blers vitgs muntagnards ids ord furma. Il maletg da tscherts

vitgs n'è strusch pli d'enconuscher.

Sch'ils indigens profitassan propi da quest svilup fiss quai perdunabel. Ma il commerzi indigen – las stizuns e las ustarias – profiteschan mo paucas emnas l'onn dals giasts en abitaziuns secundaras. Il rest da l'onn chaschunan ils letgs fraids custs d'infrastructura. Il mender è: Malgrà chasas vidas ston indigens da chars lieus turistics bandunar la regiun, per tge els na pon betg pajar ils tschains exorbitants per las abitaziuns.

Ils impressaris da construcziun han profità e gi onns dad aur. Ma cun la protecziun da la cuntrada han ins fatg il barlot. La politica ha tadlà memia ditg sin ils sufflets da la branscha da construcziun. Ier han ils votants mussà la via a la politica.

Tuttas partidas burgaisas, Tomaduas chombras federalas ed il cussegl federal èn s'exprimids cunter l'iniziativa. Ch'il pievel svizzer – enconuscent per sias decisiuns tempradas e bainponderadas – accepta in'iniziativa cun ina quota uschè radicala sto dar da pensar a la politica.